



UNIONE DEI COMUNI DEL PARTEOLLA E BASSO CAMPIDANO

Is tumbas megalìticas



S'antropitzazioni de s'àrea in s'edadi de su bruntzu est testimoniada de sa presèntzia de diversas tumbas megalìticas, de su tipu a galleria o allèe couverte (Mitza 'e Fidi) e tumbas de is gigantis (Giuanni Porcu e Ingutosu Mannu).

Sa tumba de is gigantis de Ingutosu Mannu si rivelat a is bisitatoris me is suas formas originàrias. apogianti diretamenti innui incarat s'arroca, est costituida de unu corridòiu absidau impostau apitzus de una esedra dotata de unu strintu banconi. A su centru de s'esedra unu piticu ingressu cun architravi, muniu de stantis e liminàrgiu, introdusit in sa càmera funerària, unu corridòiu costituiiu de filaris de blocus de mannas dimensionis segaus a grussu e aciuntus cun perdas piticas. Sa cobertura est a bòvida ogivali. Arrastus de su muru de

cuntenimentu testimòngiant ca in orìgini depiat èssiri coberta de unu muntoni de perda e terra.

Is scavus ant bogau a pillu is restus de medas schèletrus umanus, amuntonaus a pari a testimongiu de s'imperu cument tumba colletiva, i dimensionis funt a s'orìgini de su nòmini. Sa traditzioni bolit ca custas sepolturas iant a depi èssiri po òminis gigantis.

Sa tumba megalìtica de Mitza 'e Fidi, probabilmenti de su tipu mesturau a ortostatus a sa basi e filaris chi tirant a foras in sa crabetura, s'agatat in una pitica altura. Sa Tumba, de longhiori prus pagu de 10 m., est constituida de blocus de granitu biancu e arrubiastu. No presentat prus sa cobertura mancai is ortostatus siant cunservaus gai interamenti. Unu strintu corridòiu cunsentit s'acessu a sa càmera funerària.